

课士新艺

一
函
七
册
函



課

士

新

藝

萬成春

書



光緒辛	丑十一	月會稽	顧氏重	刊於萍	鄉縣署
-----	-----	-----	-----	-----	-----

蘇平知

萍鄉課士新藝序



余以戊子秋來宰萍鄉甫下車卽籌議整頓書院而士人方棘闈報罷意興闌珊且歲莫多解館是冬僅課試一次殊無足觀也明年己丑春循例甄別以周霄問曰兩章命題初學汗駭罔知措手而能文者皆脫穎而出余擊節歎賞不置屬鈔胥寫十餘卷置篋中厥後每課必錄其佳者又仿省城三書院例命監院以前列卷張壁間俾眾共睹能文之士益自淬厲自是而庚寅辛卯壬辰裒然成巨帙久欲付諸剞劂顧不敢自信欲得巨眼如吾鄉 傅子純太守者更抉擇而繩削之以是不果癸巳解組去橫遭謗議已決計改官矣然自矢所錄萍鄉課卷舟車水陸必以自隨或刊於他所必致數百部於萍人以符初志乃余抵省垣而 傅太守方

在吳城嗣

太守返章門而余已奉檄權廣昌蹤迹參商末由面

質比

靜山中丞泄任公道大彰於時萍邑災賑方亟

方伯翁

公既檄余回任

制府劉公復發電敦促之放賑平糶千頭萬緒

第於衡校課卷終未敢有所草率嘗默念兵貴精不貴多前所錄
四年課作已數百藝今苟再閱三年其數當復相埒此卽自爲釐
訂擇其尤佳者刻之疑者闕之更不煩假手他人遂定編壬辰以
前爲前集丙申以後爲後集本年適將刊毛子林先師關中金石
存逸攷方擬鳩匠開雕工竣卽繼及課藝此願之必償固自謂不
渝金石也會

天子下詔變法求治八股文遽成廢物猶幸春初奉經濟設科之
旨余卽於閏月特設季課以經濟六門命題風氣已開此次書院

月課改從策論多士瞻仰

維新之治奮發興起蔚然可觀余鑒前事因循之失復采近日天津國聞報湖南湘報以課藝入報章之例乃取所錄閏月特課文付諸時務菁華報館屬爲附刊惟變法之初每題不能皆有佳文而所命之題則宜全列以存其目此後卽以書院課題次第登載選輯余或自抒所見間爲擬作而兒輩一知半解有能匡諸生不逮者亦附錄焉報章之體例不同於專書活字排印亦非永登梨棗又意主鼓勵率多善善從長極知不免大雅之譏度亦可以共諒名曰課士新藝所以別於舊藝也獨是舊藝之積篋中者盈尺許不能無墮甑之顧今固無復爲刊刻之理要當舉其名以存其人約略憶之已登科者則有彭以文劉詠霓蕭家駿胡家斌楊榮

蔭鍾應德彭銘恭劉涌瀾諸生尤傑出者則有熊賡彭煥文張蔭
南鍾慎樞喻照曦張弼漢劉洪澄李泥封弟昆競爽者則有蕭詠
陶詠梅李念茲在茲張德沈德漢文乃麒乃麟此外若彭鶴年鄧
廷璠張步青朱光南李耀南黎景旭劉晉堃胡志伊蕭燮均蕭調
元蕭應璩沈廷樞歐陽健邱光日張秀張煥汪拱寅廖煥奎宋賡
梅張家樹王世禎彭國清張正蒙周鳴陽王昭德甘汝明陳慕蕃
歐陽弼謨文鈺銓蘇志林許錫文文觀宸游逢吉皆能文之士率
硜硜自守不屑干謁余因公偶一接晤或迄未識面顧其精神器
量早於下帷校閱時默相契合恍惚遇之矣夫人之心思才力苟
有專注無不可詣其至而極其精蘊者爲八股當如禪和子枯坐
入定收視返聽一如槁木死灰俄而由靜生定由定生慧忽於頂

上放犬光明與宇宙間清光灝氣相激射久乃混合爲一不復知
爲我之光明宇宙之光明也今爲策論則當如鍊師吐納導引積
歲累月泊乎龍虎旣馴坎離旣調嬰兒姤女胎孕旣成然後翔元
神於千仞之表目收十洲三島之奇麗耳接風輪雷車之震撼心
游南溟北極之寥廓返顧吾身猶踈伏一室而已周知天下之變
且也魔能害道勢不兩全則旁通丁甲之符熟習鑿劍之技以禦
外侮而衛正道其事尤不可緩若夫容成之術採補之方不務修
己而竊取他人膏血以求長生豈不謬哉諸生倘有見於此則移
其所以爲時文者致力於策論與一切新理新學在在皆堪制勝
他日建立何可限量豈惟篋中舊藝棄置爲不足惜卽今之所謂
新藝者亦特其嚆矢耳勸哉諸生毋爲宋斤魯削遷地而弗良宜

如圓璧方珪象形之惟肖也余日望之矣

光緒二十有四年龍集戊戌立秋後日躔柳十度昏大火中旦婁
中會稽顧家相勸堂氏謹序

萍鄉課士新藝卷一目錄

戊戌閏三月十三日經濟特課 題目全載

內政

問攘外必先安內今日攘外已無可言而安內究以何者爲

急 未選

洞庭鄱湖險要異同論 附錄一

外交

問西洋人來中國動云利益均霑而華民出洋種種受制必
如何乃可伸使權而保華民試詳籌之 選一

今日五洲大勢有似戰國論 選一 附錄一

理財

問金陵近有獻抽丁口稅之議者果可行否 選一

各國銀圓式樣輕重攷 未選

經武

問海軍驟難規復今日設與外洋陸戰當以何策取勝 選

附錄一

武場改試鎗礮應用何式論 未選

格物門算學

設如有甲戌庚平三角形以甲弦戌股庚勾只云勾弦和三
內延百七十五尺股弦較三十尺應求三邊三角各幾何

萍鄉縣本年立夏日申初初刻太陽高弧度數試以近年實

測驗之 均另選

考工

各國鐵軌規制異同攷 無卷

上海製造局移置內地論 無卷

以上其選四首附錄三首 凡課作同題者以類相從次篇
但標前題二字以歸簡易有擬作者則以擬作居前此闡墨
程文式也兒輩附作則列於同題課作之後倘本題課作未
選則附錄於卷末示不敢僭也 算學卷雜於策論之中不
便觀覽容俟將來積卷較多另爲選輯單行勸堂又識

對聯語容翁來蘇春連冬只爲國事忘身家
孫明卿難於得夫不取平生
野文安處以董綱君隱居共同醉舞之益御本賦
吐語清談二字以融簡易有對卦者順以觀卦
心主其義四首情義三首
土無賦志願游蜀內獻壽
無卷
古詩題賦詩題同定
無卷

附刻原設菁華報序

江海之淼淼也非舟楫不能衝其波山岳之律律也非筇屐不能陟其顛陰陽之鍾鍾也非日星不能發其光汽機之蒸蒸也非水火不能攝其力地運大闢四海一家雕題鑿齒之國虬須卷髮之儔櫻黑紅白之種麇集鱗萃競開商埠於中國一變千古閉關自守之局叩彼商務我弗如叩彼製造我弗如叩彼聲光化電格物窮理之學我亦弗如於是彼得剝我之膏扼我之吭恃其機巧玩我股掌羌民智之未開緊學業之未廣也方今

宸衷變法於

上臣僚變法於朝清議變法於野學會林立報館雲興殆欲復五帝大同之治啟五洲太平之運獨是時文驟廢樸學初興筆路藍縷之鄉繩樞甕牖之子棄其所學求所未學皇皇焉若涉大水無

津涯若躋峻坂無梯階且也腦氣之靈光無以觸引則不昌血輪
之熱力無以摩盪則不激綜擘四萬萬人之眾枕被二十三行省
千六百城邑之遠乃勵有此報館如于所學會若而人宜乎置郵
之命猶室而弗通木鐸之徇猶隘而未徧也江右據三吳上游山
川雄奧人物雋特自北宋以來以理學名以古文名以八股文名
代不乏人萍鄉雖蕞爾邑乃介吳楚之脊咸豐中湘軍倡義東征
實以萍爲門戶萍之人投袂執戟如蟻斯附蓋有楚風焉比歲
陳右銘中丞撫治湖南破除守舊之見士民踴厲變法圖新風聲
所樹震動歐美江右爲陳公桑梓而萍尤接壤最近之區有識
之士以爲踵湖南而開江右之先者非萍鄉莫屬也簡亭劉先
生萍之耆宿困於時文者垂三十年乙酉家君分校始膺鄉薦

年逾艾矣又不得志於禮部泊家君作宰是邦迺設帳延先生授燮光昆弟讀東於功令使治時文固常慮其不足用世今歲先生方主書院講席適奉經濟設科之詔諸生欲擴見聞商之先生乞爲購時務知新諸報顧南昌遠不易致長沙近而乏便先生無以應亦不忍拒也會讀天中日論旨竟廢八股文諸生益以讀書屬文致力之道爭相求教家君迺仿輶軒語書目

答問之意著勸士質言一書晝夜篝燈揮汗屬稿恆至夜分又近以經濟六條課士亦頗有佳構欲俟書成合併刊布以勸多士燮光因謀於先生儻取各報刪其繁冗兼甄采公牘私書有關經世實學者彙爲一編而賸以勸士質言兼錄課士新藝循各報通例分期以次印行俾鼓篋有先覩之快而操觚無刻期之迫不亦

善乎 先生極意嘉許爲白於 家君旣得所請同志諸君奮然
興起崇朝而議成浹旬而事舉名其書曰菁華報而使燮光敘其
匡略於庠無平不陂聖王必通變而使宜無往不復塞翁乃失意
而獲福是以久道化成復演革故之卦取威定霸肇於謀新之謠
燮光雖不敏然旣秉皋比之訓承鯉庭之命謏陋之誚所不敢辭
輒擬條目臚舉如左

巍巍聖訓天下所法出如綍綸垂爲令甲錄

諭旨第一

入告我后嘉謀嘉猷陳力就列布政優優錄

奏疏第二

維新肇基百度惟貞衛我大道去其具文錄中外政事第三

守在四夷古昔之政世變旣亟權力斯競知彼知己戰乃可勝燃
牛渚犀懸秦宮鏡錄東西洋情第四